

A sabiendas cu Gobernador no ta acepta e mocion

Gobierno a pidi Gobernador firma retiro di Marisol Lopez Tromp



Gobernador Alfonso Boekhoudt su oficina a manda un declaracion pa prensa relaciona cu e peticion di Gobierno pa firma retiro di Minister Marisol Lopez Tromp.

Gobernador ta bisa cu ayera mainta el a ricibi e Landsbesluit for di Consejo di Minister cu a firma pa duna retiro na Marisol Lopez Tromp como Minister di Infraestructura y Medio Ambiente.

Den e declaracion cu oficina di Gobernador a manda pa prensa, e ta splica cu den Consejo di Minister di diaranson, 21 di october, a bay unanimamente di acuerdo cu retiro di e persona aki como Minister.

Ayera den oranan di merdia Gobernador a manda un carta pa Presidente di Parlamento, pidiendo nan opinion riba e decision di Consejo di Minister pa retira Marisol Lopez Tromp como Minister.

Funcionamento di Gobierno ta na peligro si no por garantisca continuidad di e programa di gobernacion.

E ta bisa cu tanto p'e Ministernan (Conseho di Minister) como pa cada Minister mester ta sigui cu nan tur ta riba un solo linea y cu esaki ta ser sinti pafu tambe.

Tanto p'e Ministernan conhunto como pa cada Minister individual ta di importancia pa, encuanto e politica, nan ta riba e mes un liña y cu nan ta propaga of por propaga e liña ey.

MOCION

Gobernador lo a laga sa cu e no por trata e mocion, pasobra e no ta legal. Pesey ora cu Gobierno a manda un carta pa firma retiro di Minister Marisol Lopez Tromp, unda tur miembro di Consejo di Minister a laga sa cu nan no por traha cu e mandatario. Gobernador a manda un carta pa Presidente di Parlamento, pa pulsa opinion di Parlamento.

Pesey ayera tardi, Presidente di Parlamento a convoca un reunion di caracter di urgencia pa un reunion di Comision Central, unda mayoria a bay di acuerdo cu peticion di Gobierno.

Ayera tardi mes, Ady Thijsen como Presidente di Parlamento, a manda notifica Gobernador di decision final y p'awe ainda Gobernador lo duna retiro na Marisol Lopez-Tromp.

Mester remarca si cu den e carta Gobernador ta señala cu funcionamiento di Gobierno ta na peligro si no por garantisca unidad di e politica gubernamental. Tanto p'e Ministernan conhunto como pa

cada Minister individual ta di importancia pa, encuanto e politica, pa nan ta riba e mesun

liña y cu nan ta propaga of por propaga e liña ey.

Di e forma aki, Gabinete Wever-Croes ta core cu un Minister di su Gabinete.

REEMPLAZANTE

Partido POR di e forma aki a perde un Minister y di acuerdo cu algun hende di POR, no ta nan intencion pa nombra un otro Minister. E tiki tempo cu falta pa eleccion, nan lo sigui cu Gobierno di e forma aki.